
Պատմության մրցույթներ

Պատմության մրցույթներում հետազոտական նախագծերի իրականացման ուղեցույց

Սույնն ուղեցույցը պատրաստվել է Դի-Վի-Վի Ինթերնեյշնալի հայաստանյան գրասենյակի կողմից՝ Քյոլնի հիմնադրամի կողմից մշակված ուղեցույցի¹ հիման վրա՝ հարմարեցնելով այն հայաստանյան մրցույթի պայմաններին և նպատակներին:

Այն բաղկացած է 4 գլխից, որոնք արտացոլում են հետազոտական նախագծերի պլանավորման, նյութի որոնման, աղբյուրների ուսումնասիրման և ներկայացման փուլերն ու յուրաքանչյուր փուլի ընթացքում գործողությունների շրջանակը:

Այս ուղեցույցը կարող է օգտակար կլինել ինչպես ուսուցիչների, այնպես էլ աշակերտների համար՝ «Պատմության մրցույթներ» նախագծի շրջանակում ընտրված թեմայի շրջանակում հետազոտական աշխատանքներ իրականացնելու և ներկայացնելու համար:

Ծրագիրն իրականացվում է Գերմանիայի ժողովրդական բարձրագույն դպրոցների միության միջազգային համագործակցության ինստիտուտի (Դի-Վի-Վի Ինթերնեյշնալ) կողմից Քյոլնի հիմնադրամի և «Հազարաշեն ազգաբանական հետազոտությունների հայկական կենտրոն» ՀԿ հետ համագործակցությամբ՝ Գերմանիայի արտաքին գործերի նախարարության ֆինանսական աջակցությամբ:

Supported by



¹ <https://eustory.org/tips-tools>

1. ՆԱԽԱԳԾԻ ՊԼԱՆԱՎՈՐՈՒՄ

Հետազոտական աշխատանք դաշտում

«Պատմություն» բառը շատերի մոտ ասոցացվում է դարձվածական առարկայի, դասագրքերի, արխիվների, հայտնի մարդկանց մասին ֆիլմերի հետ: Բայց պատմությունն ավելին է, քան դա: Այն ամենուրեք է՝ քաղաքային այգում, որտեղ ամեն օր զբոսնում եք, փողոցում, ուր ապրում եք, ձեր դարձում: Անգամ այն հուշերն ու դրվագները, որոնք ձեր ծնողները կամ տարեցները պատմում են հին օրերի մասին, պատմություն են: Նամակները, բացիկները, օրագրերը, լուսանկարչական ալբոմները՝ բոլորը խոսում են անցյալի մասին:

Մասնակցելով EUSTORY Պատմության մրցույթին՝ դուք ճիշտ ուղու վրա եք կանգնում հետազոտելու ձեր իսկ միջավայրի անցյալը: Պատմությունը ուսումնասիրելու ճանապարհին կբացահայտեք անցյալի այն դեպքերը, որոնք խորը հետք են թողել ձեր տարածաշրջանի ու ընտանիքների վրա: Դուք կհասկանաք, թե ինչու են մարդիկ անցյալում գործել այս կերպ ու ոչ այլ, և ինչպես են որոշակի փոփոխությունները տեղի ունեցել: Կպարզեք, թե ինչպիսի ազդեցություն է ունեցել անցյալը ձեր քաղաքի մարդկանց կյանքի վրա: Եվ, ի վերջո, ձեր տեղական հետազոտությանը դուք կնպաստեք պատմության ընդհանուր հասկացության ընկալմանը:

Հատկապես հետաքրքիր է հանդիպումն այն մարդկանց հետ, ովքեր դեպքերի «ետնաբեմում են» եղել. ոչ թե, այսպես կոչված, հայտնի անհատների, այլ այն «հասարակ» մարդկանց հետ, ովքեր միշտ եղել են պատմության մասնիկը, և ովքեր վերապատմել կամ այլ կերպ են սերունդներին փոխանցել պատմությունը:

Եվ այսպես, սկսենք պատմական իրադարձությունների արահետներով մեր ճամփորդությունը: Քաղաքի և փողոցների նշանները տեղեկություններ են պարունակում դեպքերի կամ անհատների մասին, որոնք իրենց հերթին կարող են հանդիսանալ մեկնարկային կետեր կամ կանգառներ ձեր հետազոտության ճանապարհին: Շինությունները, հուշակոթողները և պատմական վայրերը տալիս են շատ կարևոր հուշումներ: Բարեկամներն ու ընկերները կարող են կարևոր տեղեկություններ հաղորդել որպես ականատեսներ, կամ կիսվել տվյալ իրադարձության մասին իրենց անձնական տեսակետով:

Այս ուղեցույցում ներկայացված աշխատանքային ձևանմուշները կօգնեն ձեզ ձևակերպել և քայլ առ քայլ իրականացնել ձեր սեփական պատմական հետազոտության նախագիծը:

Նախագծի Ուղենիշներ

Ինչ է պետք անել՝ պատմական հետազոտական նախագիծը հաջողությամբ իրականացնելու և ավարտին հասցնելու համար: Սկզբում անհրաժեշտ է անել լավ պլանավորում, քանի որ նման նախագծերը բաղկացած են տարբեր փուլերից: Որքան ավելի մանրամասնորեն ձևակերպեք և պլանավորեք այս փուլերը՝ նախագծի սկզբում, այնքան ավելի հավանական է, որ այն հաջողությամբ կավարտեք: Ավելին, երբ նախագծի կես ճանապարհին եք, նման ուղեցույցը թույլ է տալիս տեսնելու ձեր աշխատանքի հետագա քայլերը:

Նախագծի փուլերը չեն կարող հստակորեն տարանջատվել իրարից, դրանք անդադար հատվում են միմյանց: Առանձին փուլերը ոչ թե հաջորդում են իրար, այլ հաճախ միաժամանակ են ընթանում: Հետևաբար, պետք է ուշադիր լինել մի շարք հանգամանքների նկատմամբ:

1. Պլանավորում

- Ձևակերպել նախագծի նպատակը. գտնել թեման և առանցքային խնդիրը
- Ձևավորել թիմ (խմբային աշխատանքի համար)
- Գտնել խորհրդատուներ և ուսուցիչներ
- Որոշել աշխատանքային մեթոդները և վայրերը
- Կատարել առաջադրանքների բաշխում (խմբային աշխատանքի համար)
- Կազմել նախագծի պլան և ժամանակացույց
- Որոշել հասցեատերերին
- Մտածել աշխատանքի արդյունքի ներկայացման ձևը

Հետևյալ աշխատանքային պլանը կօգնի վերահսկել այս փուլերը.

Աշխատանքի փուլ	Աշխատանքի բնագավառ	Պատասխանատու	Մեկնարկ	Եզրակացություն

2. Հետազոտության իրականացում

- Այցելել գրադարաններ, թանգարաններ, արխիվներ
- Փնտրել փորձագետներ
- Կազմել հավանական ակնառեսների ցանկեր
- Նախապատրաստել և անցկացնել հարցազրույցներ
- Հավաքել, նկարագրել, խմբագրել, վերլուծել գրականություն և աղբյուրներ թեմայի վերաբերյալ, և համեմատել դրանք մյուսների հետ
- Շարունակաբար հետևել, որ չձեռնարկված թեմայից կամ խնդրից
- Հաճախակի ստուգել, որ բոլոր մասնակիցները ներգրավված լինեն նախագծին
- Կատարել թեմատիկ նշումներ
- Գրանցել նոր մտքեր
- Ամփոփել նախագծի արդյունքները՝ ներկայացնելով համապատասխան ձևաչափով (օր.՝ էսսե, ցուցահանդես, այլ):

3. Ներկայացում

- Ընտրել լսարանին մատչելի ներկայացման ձև՝ շարադրություն, տեսահոլովակ, պաստառ, ֆիլմ, թատերական ներկայացում, և այլն:

Մտազրոհ

Պատմական ուսումնասիրության համար նախնառաջ անհրաժեշտ է գտնել թեմա: Մտազրոհի ընթացքում նախնական մտքեր հավաքելը կօգնի հեշտ փնտրել և որոշում կայացնել թեմայի վերաբերյալ: Այնուհետև կարող եք դասակարգել ձեր մտքերը՝ ըստ բաժինների: Մտազրոհ անել նշանակում է ստեղծագործաբար մտածել որոշակի ժամանակահատվածում և հավաքել բոլոր մտքերը թեմայի վերաբերյալ:

Դա տեղի է ունենում հետևյալ կերպ.

1. Մտազրոհ (մոտ 5-10 րոպե)

Ընդհանուր թեմայի մասին մտածելիս՝ ի՞նչ է առաջինը գալիս ձեր միտքը:

- Միասին նստեք շրջան կազմած, կենտրոնում դրեք նշումների համար նախատեսված թղթեր: Բոլոր մասնակիցները պետք է գրեն այն ամենը, ինչ գալիս է իրենց միտքը: Ամեն գաղափարի համար օգտագործեք առանձին թերթիկ: Թույլատրելի են բոլոր մտքերը. փորձառություններ, փաստեր, գրքերի վերնագրեր, ֆիլմեր կամ երգեր, փողոցների անուններ, արվեստի գործեր, մարդիկ, և այլն:

Գաղափարների
հավաքագրում


- Հավաքեք նշումներով թղթերը և ամրացրեք դրանք ներկայացման պատին:

2. Խմբավորել (30-40 րոպե)

Դասակարգե՛ք ձեր մտքերը

Խմբավորելիս կնկատեք, որ ձեզնից շատերը ունեն նույն գաղափարը, կամ գրել են այնպիսի առաջարկներ, որոնք իրար շատ համապատասխանում են: Մակայն կլինեն և այնպիսի թերթիկներ, որոնք չեն համընկնի մյուսների հետ: Խմբավորելը կօգնի այս ամենը հեշտ հասկանալ ու տեսնել: Մա անելու համար պետք է հավաքել նույն վերնագրով կամ նմանատիպ թեմատիկայով բոլոր թերթիկները՝ ըստ «մտքերի փնջերի»: Մի կողմ դրեք այն թերթիկները կամ մտքերը, որոնք այս կերպով չեն դասակարգվում:

Օրինակ, «միգրացիա» ընդհանուր թեմայի խմբավորումը կարող է նման տեսք ունենալ.



Գաղափարների դասակարգում


«Մտքերի աղցան»

Մտազրոհից հետո ձեզ հաջողվեց գեներացնել գաղափարներ և ձեռքի տակ բազմաթիվ թեմաներ ունենալ: Եթե դժվարանում եք ընտրել մեկ թեմա հետազոտական ծրագրի համար, կարող եք փորձել «մտքերի աղցան» վարժանքը:

Դրա համար անհրաժեշտ են գրիչներ և շատ թղթեր: Ավելի լավ կլինի ունենալ գունավոր թղթեր՝ ամեն թեմայի համար մեկ գույն:

Թեմայի մասին մտքեր հավաքել

- Նորից նստե՛ք շրջան կազմած: Ապա գրի՛ առեք ձեր թեմաները՝ յուրաքանչյուրը առանձին թղթի վրա: Դասավորե՛ք այս թղթերը հատակին:
- Հիմա բոլորը պետք է գրեն իրենց գաղափարները յուրաքանչյուր թեմայի վերաբերյալ: Ամեն գաղափարը պետք է գրվի առանձին թղթի վրա, այնուհետև դրանք պետք է միասին դրվեն համապատասխան թեմայի կողքին:



- Այնուհետև բաժանվեք խմբերի. խմբերը պետք է լինեն ըստ եղած թեմաների քանակի: Յուրաքանչյուր խումբ առանձնանում է և սկսում դասակարգել թղթերի խուրցը՝ կիրառելով թեմատիկ փնջերի մեթոդը:

**Դասակարգել
մտքերը**

Թեմայի փորձարկում

Երբ դուք արդեն գիտեք այն թեման, որն ուզում եք հետազոտել պատմության մրցույթի շրջանակներում, հարց է ծագում, թե ինչպես համոզվել, որ այս թեման իսկապես համապատասխանում է նախագծին:

Հետևյալ հարցերը կարող են օգնել ստուգել ձեր թեման մինչև վերջնական որոշում կայացնելը: Եթե կարողանաք բոլոր հարցերին «այո» պատասխանել, ապա հետազոտությունը սկսելու որևէ խոչընդոտ չկա:

- Արդյո՞ք թեման մեզ հետաքրքիր է:
- Կա՞ որևէ բան, որն ուզում ենք բացահայտել:
- Ի՞նչն է թեման արդիական դարձնում, և հնարավո՞ր է այն ուսումնասիրել:
- Արդյո՞ք թեման վերաբերում կոնկրետ մարդկանց, իրադարձությունների, երևույթների կամ առարկաների, որոնք կարելի է ուսումնասիրել:
- Արդյո՞ք ծրագրի իրականացման ժամանակահատվածը խելամիտ է:
 - Արդյո՞ք կան տարբեր տիպի աղբյուրներ, գրականություն:
 - Արդյո՞ք հնարավոր է կապ հաստատել աղբյուր հանդիսացող անձի կամ ընտանիքի, ականատեսների հետ:
 - Արդյո՞ք ունենք որևէ անձնական կապ թեմայի հետ՝ օրինակ, ընտանեկան պատմություն:
 - Արդյո՞ք տվյալ մարզում /շրջանում հնարավոր է գտնել թեմայի հետ առնչվող հետքեր (հուշարձաններ, փողոցների անուններ, այլ):
 - Ի՞նչ փորձագետ կարող է մեզ աջակցել:

Թեմայի
ստուգում

Կառուցվածքը բովանդակությունից առաջ.

հետազոտական նախագծի նախնական ուրվագծում

Հաճախ պատմության հետքեր փնտրելիս հետազոտողները շատ արագ կուտակում են աներևակայելի քանակի նյութեր: Այս խառնաշփոթի մեջ չկորելու համար կարևոր է պատրաստել թեմայի ընդհանուր կառուցվածքն ու ուղղությունը՝ նախքան հետազոտություն սկսելը: Կառուցվածքային պլանի (պլան) մշակումը թույլ կտա դրան անդրադառնալ ողջ հետազոտության ընթացքում և շարունակաբար

համադրել այն արդեն իսկ հետազոտված նյութի հետ՝ հասկանալու, թե որքանով է պետք փոփոխել պլանը: Այսպիսով, պլանը հետազոտության մի մասն է:

Ինչպե՞ս ստեղծել պլանը: Նախևառաջ պետք է լավ պատկերացնել թեման: Խորհուրդ է տրվում համառոտագրեր կարդալ՝ հասկանալու համար նյութի այն կողմերը, որոնք առնչվում են ձեր թեմային: Եթե թեման դեռևս հետազոտված չէ՝ օգտակար կլինի հարցազրույց անցկացնել ականատեսի հետ: Այնուհետև կարող եք ստեղծել հետազոտության առաջին պլանը, որկ կհիմնվի չմշակված, բայց բավական լայն նախնական գիտելիքի վրա:

Թեման կարելի է կառուցել տարբեր սկզբունքներով: Առաջին սկզբունքը «Ժամանակագրական» մեթոդն է: Այս պարագայում պլանը կառուցվում է սովյալ իրադարձության սկզբով, դրա պատճառներով, ապա հետևում են զարգացումները և հետևանքները: Ժամանակագրական պլան կազմելիս բավարար չէ միայն իրար կապել մի շարք տարեթվեր: Փոխարենը, դուք՝ որպես հեղինակներ, պետք է որոշեք, թե ինչն է այստեղ էականը: Այսպիսով, դուք առանձնացնում եք թեմաներ, որոնք զարգանում են ժամանակագրական հերթականությամբ. օրինակ՝ կենսագրության մեջ հերթականությամբ նշվում են հետևյալ իրադարձությունները. «մանկապարտեզ – դպրոց – համալսարան – ընտանիք»:

Հետազոտության պլանի մյուս սկզբունքը կոչվում է «կառուցվածքային»: Այս դեպքում մասնավոր իրավիճակը անկարևոր է հետազոտության համար: Փոխարենը, այստեղ էական են զուգորդումները, և թեմային պետք է մոտենալ տարբեր կողմերից: Օրինակ, քաղաքի որոշ թաղամասերում ներգաղթյալների վերաբերյալ նախագծի շրջանակներում կարող եք հարցադրում անել, թե ինչպիսի համահարթ ինտեգրում է տեղի ունենում աշխատանքային մակարդակում, բնակության վայրի տեսանկյունից, հասարակական հարաբերություններում, և այլն:

Հնարավոր է նաև համատեղել պլանավորման տարբեր սկզբունքներ, եթե թեման դա պահանջում է: Օրինակ, պատմության վերաբերյալ աշխատանքը կարող է ունենալ ինչպես ժամանակագրական, այնպես էլ համեմատական ասպեկտներ:

Երբ հետազոտության պլանը պատրաստ է, բոլոր այն նյութերը, որոնք դուք հավաքագրում և վերլուծում եք հետազոտության ընթացքում, պետք է համապատասխանեցվեն այդ պլանին: Այս դեպքում կնկատեք, որ հաճախ ձեր նյութը չի կարող սահմանվել միայն մեկ գլխով, քանի որ այն շոշափում է թեմայի մեկից ավելի կողմերը:

Նման դեպքերում ամենահեշտ լուծումը նյութը բաժանելն է՝ ըստ պլանի ենթաթեմաների և տեսակավորել թեմաները ըստ գլուխների:

Յուրաքանչյուր փաստաթուղթ պետք է ունենա աղբյուրի մասին արձանագրումը: Սա անելու լավագույն ձևը հապավումների համակարգ ստեղծելն է, որպեսզի դուք ստիպված չլինեք ամեն էջի վրա գրել ամբողջական հղումը:

Ժամանակագրական ուրվագծում

Կառուցվածքային ուրվագծում

Համակարգել նյութն ըստ ուրվագծի

2. ՆՅՈՒԹԻ ՈՐՈՆՈՒՄ

Նյութի որոնում

Հետազոտության թեման որոշելուց հետո սկսվում է հետազոտության հիմքի՝ նյութի որոնումը: Պատմաբանները նյութն անվանում են «աղբյուր»: պատմության ուսումնասիրության մեջ անցյալի մասին տեղեկություն հաղորդող ցանկացած բան դիտարկվում է որպես «աղբյուր»: Եթե նյութը տալիս է ձեր հարցադրումների պատասխանը, գրեթե ամեն ինչ կարող է դիտարկվել որպես աղբյուր: Հետազոտողն ինքն է ընտրում իր աղբյուրը. ներքոհիշյալ հնարավոր աղբյուրների ցանկը միայն առաջարկ է և ամբողջական լինելու որևէ նկրտում չունի:

Ի՞նչը կարող է աղբյուր հանդիսանալ

- Գրքեր և գրականություն
- Հանրագիտարաններ
- Նամակներ
- Օրագրեր
- Վիճակագրություն
- Փաստաթղթեր
- Թերթեր
- Ֆիլմեր
- Լուսանկարներ
- Ծաղրանկարներ
- Հեռուստատեսային հաղորդումներ
- Հարցազրույցներ ականատեսների հետ
- Ռադիոհաղորդումներ
- Իրեր

Աղբյուրներ

Որտե՞ղ գտնել աղբյուրներ

Աղբյուրներ կարելի է գտնել տարբեր վայրերում.

- Գրադարաններում** կարելի է գտնել գրքեր և պարբերականներ:
- Արխիվներում** կարելի է գտնել չիրապարակված տեքստային աղբյուրներ (օրինակ՝ փաստաթղթեր, նամակներ և այլն), նկարներ (տոհմաճառեր, քարտեզներ, գծանկարներ, լուսանկարներ, պաստառներ, բացիկներ) կամ ֆիլմեր և այլ

Որտե՞ղ գտնել
աղբյուրներ

տվյալներ:

- **Թանգարանները** հավաքում և պահպանում են հատկապես անցյալին վերաբերող իրեր:
- **Համացանցում** նույնպես կարելի է աղբյուրներ գտնել: Բազմազանությունը մեծ է՝ գիտական տեքստերից մինչև նկարներ և ձեռագրեր:
- **Տեսարժան վայրեր այցելության** կամ **քաղաքային զբոսանքների** ժամանակ կարելի է բացահայտել աղբյուրների բնօրինակներ, իսկ ձեր ընտանիքներում կարող եք գտնել անձնական փաստաթղթեր՝ նամակներ, օրագրեր կամ նկարներ:
- Ականատեսների հետ **հարցազրույցները** ցույց են տալիս, թե ինչպես դուք՝ որպես հետազոտող, կարող եք ինքներդ աղբյուր ստեղծել:

Համացանց. նավարկելով տվյալների օվկիանոսում

Համացանցը բազմաթիվ հնարավորություններ է ընձեռում՝ ներբեռնել երաժշտություն, ֆիլմեր, նկարներ և համակարգչային ծրագրեր, կարդալ և գրել նամակներ, խաղալ խաղեր, զրուցել, ստեղծել ձեր սեփական կայքերը և, վերջապես, որոնել տեղեկատվություն:

Կան բազմաթիվ կայքեր, որոնք առաջարկում են հիմնավոր գիտելիքներ: Օրինակ՝ այսօր բավականին շատ **թերթեր** և **պարբերականներ** ունեն առցանց տարբերակներ: **Գիտական հաստատությունները** ևս առցանց հրապարակում են հատվածներ էսսեներից և գիտական աշխատանքներից: Նշանավոր **թանգարանների** կայքերում կարելի է կարդալ նրանց հավաքածուների գանձերի մասին, իսկ մեծ **գրադարանների** առցանց գրացուցակներում կարող եք գրքեր որոնել: Համացանցը միանշանակ օգտակար գործիք է ձեր աշխատանքի համար տեղեկատվություն գտնելու համար:

Եթե չգիտեք ձեր հետազոտության թեմայի վերաբերյալ տեղեկատվություն պարունակող կոնկրետ կայք, կարող եք օգտվել **որոնողական համակարգերից**:

Համացանցում այնքան շատ տեղեկատվություն կա, որ որևէ բառով որոնման արդյունքում ստանում եք անվերջ տեղեկատվության և բյուրավոր կայքերի հասցեներ: Առաջարկվող բոլոր հղումներն ուսումնասիրելը չափազանց ժամանակատար է, հետևաբար, իմաստ ունի նեղացնել **որոնման նպատակը**՝ նախօրոք հստակեցնելով այն

Որտեղ փնտրել

Ինչպես
փնտրել

հարցերը, որոնց պատասխանները փնտրում էք համացանցում: Փոխակերպեք հարցերը համապատասխան **բանալի բառերի** մեջ և որոնման համար դրանք օգտագործեք: Հաշվի առեք նաև այն, որ որոնման համակարգի արդյունքների ցանկի վարկանիշը չի երաշխավորում առաջարկվող նյութի որակը կամ պիտանելիությունը: Երբ բանալի բառերի միջոցով գտնում եք կոնկրետ կայքեր, նշեք՝ որ հասցեով ինչ տեղեկատվություն եք գտել, որպեսզի հետագայում խուսափեք բազմակի որոնումներից: Բացի այդ, որոշեք՝ ինչ եք ցանկանում անել տեղեկատվության հետ. անմիջապես տպել, պահպանել, ուղարկել էլեկտրոնային փոստով, արտագրել և այլն:

Որքան էլ համացանցի ընձեռած հնարավորությունները հրաշալի լինեն, այնտեղ առկա տվյալները հաճախ կասկածելի են. ուշադիր եղեք: Ինչպես չի կարելի համացանցից ներբեռնել անխտիր ցանկացած նյութ, այնպես էլ չպետք է որպես փաստ ընդունել այնտեղ հանդիպող ցանկացած տեղեկատվություն: Համացանցում գտած տեղեկության հավաստիությունը պետք է ստուգվի ճիշտ այնպես, ինչպես ցանկացած այլ աղբյուրի դեպքում: **Ինտերնետ կայքերի հավաստիությունը** գնահատելու համար կարող եք հետևյալ հարցադրումներն անել.

- Ո՞վ է կայքի **հեղինակը**, կամ ո՞վ է այն վարում: Արդյո՞ք տվյալ անձն ունի համապատասխան կրթություն: Գործ ունե՞ք թանգարանների՞, հաստատությունների՞, ընկերությունների՞, թե՞ անհատների հետ: Այս հարցում ձեզ կօգնի յուրաքանչյուր կայքէջի «մեր մասին» բաժինը :
- **Տեղեկատվության ծագումը** վստահելի՞ է: Աղբյուրները նշվա՞ծ են, կա՞ն մեջբերումներ կամ հղումներ: Եթե կան, արդյո՞ք աղբյուրները վստահելի են:
- Ձեզ հայտնի՞ են այլ անձանց կամ հաստատությունների **կարծիքներ** կամ երաշխավորություն տվյալ կայքի բովանդակության կամ օպերատորի վերաբերյալ:
- **Բովանդակության** տեսանկյունից ի՞նչ տեղեկատվություն է պարունակում կայքը: Որքանո՞վ է թեմայի վերաբերյալ տեղեկատվությունը համապարփակ: Արդյո՞ք այն համապատասխանում է այլ աղբյուրներից ստացված տեղեկատվությանը (գրքեր, մասնագիտական ամսագրեր, արխիվներ և այլն):
- Որքանո՞վ է տեղեկատվությունը **այժմեական**: Արդյո՞ք այն փաստական, համոզիչ, հանգամանալից ու համապարփակ կերպով է ներկայացված:
- Ինչպե՞ս է **ներկայացվում** բովանդակությունը: Կա՞ն ուղղագրական սխալներ: Նախադասության կառուցվածքի կամ տրամաբանության հետ խնդիրներ կա՞ն: Արդյո՞ք ձևակերպումները պարունակում են բացահայտ կամ թաքնված նախատրամադրվածություն:

**Ստուգելով
տեղեկատվությունը**

Եթե օգտվում եք այս մեթոդներից համացանցում գտած տեղեկատվությունը ստուգելու համար, արագ կնկատեք, որ համացանցը չի կարող լինել տեղեկատվության միակ աղբյուրը, երբ դուք պատմական հետազոտության վրա եք աշխատում: Գրադարանները, արխիվները, թանգարանները, ինչպես նաև հարցազրույցները ավելի հարուստ նյութ են պարունակում:

Հարցազրույցներ ականատեսների հետ. աշխատելով կենդանի պատմության հետ

Վկաների հետ զրուցելու մեթոդաբանությունը ընդունված է անվանել «բանավոր պատմություն»: Երկար ժամանակ պատմության ուսումնասիրության առարկա էին հանդիսանում միայն պետությունները և պետական գործիչները, սակայն բանավոր պատմությունը, ի թիվս այլոց, փոխեց դա: Բանավոր պատմությունը գործ ունի անհատների սուբյեկտիվ փորձառությունների հետ, հատկապես նրանց, ովքեր հասարակության ուշադրության կենտրոնում չեն: Այս մարդկանց հիշողությունները գրանցվում են հարցազրույցների միջոցով: Անձնական հիշողությունների միջոցով պատմությունը կենդանանում է: Գրքերից վերցված փաստերը դառնում են «մարդկային», ավելի հուզիչ, ավելի վառ և անմիջական:

Ցանկացած ոք կարող է լինել ականատես: Ականատեսներ գտնելու լավագույն միջոցը ձեր շուրջը փնտրելն է՝ հարևանների, հարազատների և ծանոթների շարքերում:

Ականատեսի հետ հարցազրույցից կարելի է վերհանել մարդու ապրելակերպը: Զրուցակցի անձնական հիշողություններից կարող եք իմանալ՝ ինչպես են քաղաքական և սոցիալական փոփոխություններն ազդել նրանց կյանքի վրա, ինչպես են նրանք վերապրել այդ փոփոխությունները և ինչպես են հետահայաց գնահատում դրանք: Առանձին դեպքերում ականատեսի պատմությունը կարող է լույս սփռել գրավոր աղբյուրներից բացակայող հանգամանքների վրա: Բայց ականատեսի հետ հարցազրույցի հիմնական թիրախը ոչ թե պատմական փաստերն են, այլ նրա կյանքում անցյալի անձնական փորձառությունը, ընկալումները և ապրումները:

Ի՞նչպես հարցազրույց վարել ականատեսի հետ

Ականատեսների հետ հարցազրույցին պատրաստվելիս և անցկացնելիս հաշվի՝ առեք հետևյալը.

Նախապատրաստական փուլ

- Ո՞րն է հարցազրույցի նպատակը. հավաքագրում եք փաստական տվյալներ, թե՞ անձն ու նրա կյանքի պատմությունն են ավելի

կարևոր:

- Հնարավորինս խորը ուսումնասիրեք նյութը և պատմական համատեքստը (թեմային վերաբերող դասագրքեր, հանրագիտարաններ, տեղեկատու գրքեր և այլն):
- Մտածեք՝ ում հետ եք հարցազրույց անելու (տատիկ-պապիկներ, հարևաններ...):
- Նախնական տեղեկություն հավաքեք ականատեսների մասին (անուն, տարիք, մասնագիտություն, կրթություն)
- Նամակի կամ հեռախոսազանգի միջոցով կապ հաստատեք նրանց հետ. ներկայացեք ու ներկայացրեք ծրագիրը:
- Եթե ականատեսը տատանվում է, կարող եք առաջարկել նախապես ուղարկել հարցերը: Հարցազրույցը կարող է նաև անանուն մնալ:
- Հնարավորին չափ բաց, կարճ և հասկանալի հարցեր պատրաստեք (ինչպե՞ս, ինչու՞, ի՞նչ):
- Կարելի է «փորձնական հարցազրույց» անել, օրինակ՝ ձեր ծնողների հետ:
- Երբեմն ականատեսները մեծ դժվարությամբ են խոսում իրենց կյանքի մասին: Որոշները չեն կարողանում զուգել արցունքները: Եթե նման իրավիճակները վախեցնում են ձեզ, թող հարցազրույցին մեկ ուրիշ մեծահասակ էլ ներկա լինի:

Հարցազրույցի ընթացք

- Եղեք ճշտապահ և նախապես շնորհակալություն հայտնեք ականատեսին հարցազրույցի համար:
- Ներկայացեք, հակիրճ պատմեք հետազոտական նախագծի մասին:
- Այնպես սկսեք հարցազրույցը, որ խրախուսեք մասնակցին խոսել (սկսեք ուղիղ հարցով, օգտագործեք լուսանկարներ կամ ուրիշ նյութեր, օրինակ՝ հատված հոդվածից): Փորձեք զրուցակցին հաճախ չընդհատել, փոխարենը՝ հակիրճ գրի առեք հնարավոր հարցերը կամ ճշգրտումները
- տվեք ճշգրտող հարցեր՝ բացերը լրացնելու համար, խնդրեք լուսանկար կամ օրագիր, եթե դրանք առկա են:

Ինչպես նաև՝

- Մտուգեք ձայնագրող սարքը (ձայնագրիչ, տեսախցիկ, MP3 նվագարկիչ), մարտկոցների առկայությունն ու լիցքը:
- Եթե հարցազրույցի խմբով եք գնում, նախապես որոշեք՝ ինչպես կիսել հարցազրուցավարի պարտականությունները: Ո՞վ է հարցեր տալու: Ո՞վ է հետևելու սարքավորումների անխափան աշխատանքին: Ո՞վ է ժամանակ պահելու:

- Շնորհակալություն հայտնեք ականատեսին գրույցի համար և հարցրեք՝ արդյո՞ք հնարավոր է նորից հանդիպել, եթե նոր հարցեր առաջանան:

Հարցազրույցից հետո

1. Սղագրեք հարցազրույցը ամբողջությամբ կամ մասամբ:
2. Փորձեք նկարագրել զրուցակցին, կազմել նրա կարճ կենսագրությունը. որո՞նք են նրա կյանքում կարևորագույն իրադարձություններն ու փորձառությունները:
3. Այժմ գնահատեք հարցազրույցը ձեր հետազոտական հետաքրքրությունների համատեքստում. ի՞նչ նոր բան եք իմացել: Ի՞նչն է ձեր կարծիքով ամենահամոզիչը: Հարցազրույցում կա՞ն բացեր կամ հակասություններ: Ինչպե՞ս կարող եք բացատրել այդ բացերը: Ո՞ր հատվածներն են վերհանում զրուցակցի տեսակետը ձեր հետազոտության համար առանցքային նշանակություն ունեցող հարցերի վերաբերյալ:
4. Համեմատեք զրուցակցի պատմությունը այլ տեղեկությունների հետ: Մյուս ականատեսներն ի՞նչ են պատմում թեմայի վերաբերյալ: Ի՞նչ են պատմաբանները գրում նույն թեմայի մասին: Ձեր զրուցակցի և այլ մարդկանց պատմությունների միջև հակասություններ կա՞ն: Ինչպե՞ս կարելի է դրանք բացատրել:

Փորձագիտական հարցազրույցներ. տեղեկության փնտրտուքում

Փորձագետները մարդիկ են, ովքեր լավ տեղեկացված են տվյալ թեմայի մասին աշխատանքի բերումով, չափազանց հետաքրքրված են դրանով կամ հաճախ են գործ ունեցել տվյալ թեմայի հետ:

Քանի որ հետազոտության ընթացքում բախվում եք նյութերի, տեղեկատվության և գաղափարների ահռելի ծավալի, փորձագետը կարող է օգնել մի փոքր դասակարգել ամեն ինչ: Ավելին, փորձագետը կարող է դիպուկ և տեղին խորհուրդներ տալ՝ օգնելով ձեզ ճիշտ խուսանավել գրքերի օվկիանոսում: Նա կարող է ուղղորդել ձեզ դեպի հետաքրքիր մանրամասներ և օգնել գտնել ձեր թեմայի առանցքը: Փորձագիտական հարցազրույց պլանավորելիս առաջնորդվեք այն նույն սկզբունքներով, ինչ ականատեսի հետ խոսելիս՝ շեշտը դնելով փորձագիտական գիտելիքների վրա, որոնք կարող են լրացնել ձեզ մոտ պակասող տեղեկությունները:

Հասարակական կարծիքի հարցում

Հետազոտական ծրագրի թեման որոշելուց հետո պետք է մտածել՝ ինչպես գտնել ձեր առջև ծառայած հարցերի պատասխանները: Կարծիքի հարցումը լավ մեթոդ է հասկանալու համար՝ ինչ են այսօր մարդիկ մտածում ձեր թեմայի այս կամ այն բաղադրիչի մասին և, առհասարակ, ինչ գիտեն դրա մասին: Նման հարցումը հատկապես արժեքավոր է, եթե ձեր թեման շարունակում է ակտուալ լինել մարդկանց կյանքում, օրինակ՝ երբ գրում եք ձեր քաղաքի որևէ հուշարձանի կամ շենքի մասին, որը հայտնի է հարցվողներին:

Հետևյալ կետերը կօգնեն ձեզ հաջողությամբ անցկացնել հարցումը:

1. Նախապատրաստություն

- Մանրակրկիտ ձևակերպված հարցարանը հաջողության գրավականներից մեկն է: Հետևաբար պետք է հստակ պատկերացում ունենաք՝ ինչ եք ուզում վերհանել հարցումով և համապատասխանաբար ձևակերպեք հարցերը:
- Փորձեք սահմանափակվել մի քանի հարցով այնպես, որ հարցարանի ծավալը չգերազանցի մեկ էջը:
- Փորձեք այնպես կազմել հարցարանը, որ հարցվողները հնարավորինս կարճ պատասխանեն. անհրաժեշտության դեպքում կարող եք նույնիսկ մի քանի հնարավոր պատասխան նշել:
- Բաց և փակ հարցերի միջև տարբերություն կա
 - Փակ հարցերը ենթադրում են, որ հնարավոր պատասխանները նշված են, և հարցվողն ընտրում է դրանցից մեկը: Փակ հարցերը կարելի է հեշտությամբ վիճակագրորեն վերլուծել:
 - Բաց հարցերի դեպքում հարցվողը պատասխանը ձևակերպում է իր բառերով. պատասխանները վեր են հանում զգալի ծավալի տեղեկատվություն, բայց դրանք դժվար է գնահատել: Ուստի բաց հարցերի քանակը պետք է սահմանափակվի:
 - Կարելի է նաև համատեղել փակ և բաց հարցերը: Օրինակ՝ փակ հարցերով զրուցակցին կարող եք հնարավորություն տալ նշել սեփական պատասխանը, որը, բնականաբար, ներառված չէ առաջարկվող պատասխանների շարքում:
- Հարցաթերթիկի սկզբում կամ վերջում հարցվողի մասին անձնական հարցեր են նախատեսված: Ինչպես խորացված հարցազրույցի դեպքում, նախքան հարցեր տալը պետք է լավ մտածել, թե ինչն է ձեզ հետաքրքրում: Եթե կոնկրետ անձի մասին անձնական տվյալները ձեզ համար կարևոր

Հարցարանի
կազմում

չեն, կարող եք հարցաթերթիկը անանուն թողնել:

- Հարցարանը խորհուրդ է տրվում կազմել համակարգչով:

2. Ինչպես անցկացնել հարցում

Հարցում անցկացնելու մի քանի ձևեր կան: Կարելի է հարցվողներին ուղարկել հարցաթերթիկ, որը նրանք կլրացնեն և հետ կուղարկեն ձեզ: Կարելի է նաև մարդկանց դեմ առ դեմ հանդիպել, օրինակ՝ պատահական անցորդներին կամ դպրոցական ընկերներին:

- Եթե որոշեք դեմ առ դեմ հարցազրույց վերցնել, զրույցի սկզբում համառոտ նկարագրեք ձեր հարցման նպատակը և ներկայացրեք ինքներդ ձեզ ու ձեր ծրագիրը: Հնարավոր է, մարդիկ չցանկանան հարցազրույց տալ. այդ դեպքում քաղաքավարի շնորհակալություն հայտնեք նրանց և փնտրեք այլ զրույցակիցներ:
- Հետներդ գրիչներ վերցրեք: Ավելի լավ կլինի, եթե հարցազրույցավարն ինքը նշի հարցվողի պատասխանները հարցաթերթում: Որպես կանոն դա խրախուսում է մարդկանց մասնակցությունը:
- Վերջում հարցվողներին շնորհակալություն հայտնեք համագործակցության համար:

Ինչպես անցկացնել
հարցում

3. Գնահատում

Հավաքագրված տեղեկատվությունը կարող եք ամփոփել գծապատկերում կամ գրաֆիկորեն ներկայացնել դիագրամներով:

Գնահատում

3. ԱՂԲՅՈՒՐՆԵՐ

Աղբյուրների հետ աշխատանք

Յուրաքանչյուր աղբյուր պետք է մեկնաբանվի և մանրամասն ուսումնասիրվի: Դա արվում է սկզբնաղբյուրի մասին որոշակի հարցադրումներ անելով:

- Ի՞նչ էք ուզում իմանալ սկզբնաղբյուրից
- Ինչպիսի՞ աղբյուրի հետ գործ ունեք:
- Ո՞վ է հեղինակը:
- Որտե՞ղ և ե՞րբ է ստեղծվել աղբյուրը (օրինակ՝ պատմական ո՞ր դարաշրջանում) և ի՞նչ համատեքստում է այն առաջացել (ինչպե՞ս և ինչո՞ւ):
- Արդյո՞ք այն կապված է վերջին իրադարձությունների հետ, թե՞ վերաբերում է ավելի հեռավոր անցյալի իրադարձություններին:
- Ո՞ւմ է ուղղված աղբյուրը: Արդյո՞ք նշված է հասցեատերը:
- Ի՞նչ տեղեկատվություն է պարունակում աղբյուրը և որքանո՞վ է այն թերի:
- Բովանդակության մեջ հակասություններ կա՞ն:

Նկարագրելով և
հասկանալով
աղբյուրը

Տեսակետներ. ամեն ինչ հանգում է դիրքորոշմանը

Մարդու՝ իր և իր շրջապատի ընկալումը նշանավորվում է տարբեր ազդեցություններով և փորձառություններով, որոնց անձը ենթարկվում է կյանքի ընթացքում: Մարդիկ ունեն ազգային, կրոնական, քաղաքական պատկանելություն, և դա ազդում է շրջապատի ու ինքն իր ընկալման վրա: Հենց այդ պատճառով սկզբնաղբյուրի հետ աշխատելիս հարկավոր է հասկանալ **հեղինակի պատկերացումները**:

- Սկզբնաղբյուրի հեղինակը կի՞ն է, թե՞ տղամարդ: Քանի՞ տարեկան էր նա սկզբնաղբյուրը ստեղծելու պահին: Ի՞նչ կրոնի, էթնիկ խմբի, ազգության կամ մշակութային շրջանակների է պատկանում անձը:
- Ի՞նչ քաղաքական դիրքորոշում ունի հեղինակը:
- Ի՞նչպիսի տնտեսական միջավայրում է գործում հեղինակը: Ինչպիսի՞ սոցիալական դիրք է զբաղեցնում: Ի՞նչ կրթություն է

Հեղինակի
տեսանկյունը

ստացել: Ի՞նչ աշխատանք ունի:

- Ե՞րբ է ստեղծվել սկզբնաղբյուրը: Որքանով է ժամանակահատվածը կարևոր հեղինակի համար:

Հնարավոր հարցերի բազմազանությունը ցույց է տալիս, որ միևնույն իրադարձությանը կարելի է տարբեր կերպ նայել: Օրինակ՝ բողոքի ցույցի մասին հիշողությունները կարող են շատ տարբեր լինել՝ կախված նրանից՝ գրուցում էք ուստիկանի, թե ցուցարարի հետ:

Պատմաբանները խոսում «բազմակի տեսանկյունների» կարևորության մասին ցույց տալու համար, որ գոյություն ունի մեկից ավել «ճշմարիտ» տեսանկյուն:

Ինչպես աշխատել գիտական գրականության հետ

Պատմագրական աշխատանքի կարևոր պայման է գիտական գրականության ընթերցման և սերտման հմտությունը: Հետևյալ կետերը կօգնեն առավել դյուրին աշխատել նման տեքստերի հետ:

«Աչքի անցկացնել» տեքստերը

Կարելի է արագ պարզել՝ արդյո՞ք տվյալ գիրքը համապատասխանում է ձեր թեմային: Ուշադիր կարդացեք գրքի կամ հոդվածի վերնագիրը: Վերնագիրը հուշում է ինչի մասին է գիրքը կամ տեքստը: Արդյո՞ք վերնագրից պարզ է դառնում, թե որ ժամանակաշրջանի ու ինչ աշխարհագրության մասին է խոսվում տեքստում:

«Աչքի անցկացնել»
տեքստերը

Եթե, այնուամենայնիվ, վստահ չեք, որ տվյալ գիրքը համապատասխանում է ձեր հետազոտության կարիքներին, ուշադրություն դարձրեք դրա բովանդակությանն ու գրականության ցանկին: Գրքի առաջաբանն ու վերջաբանը և/կամ առանձին գլուխների ներածություններն աչքի անցկացնելը կարող է օգտակար լինել հասկանալու համար՝ արդյո՞ք տվյալ նյութը պարունակում է հետազոտության համար անհրաժեշտ տեղեկություններ:

Գրականության ցանկ

Ինքներդ կազմեք համապատասխան գրքերի ցանկ՝ ողջամիտ ծավալի:

Ընթերցման տեխնիկա

Անհնար է կարդալ յուրաքանչյուր տեքստ սկզբից մինչև վերջ: Այդ իսկ պատճառով խորհուրդ է տրվում կիրառել հպանցիկ ընթերցման տեխնիկան (կամ արագ ընթերցում), երբ ընթերցողը փնտրում է որոշակի

Ընթերցման
տեխնիկա

բանալի բառեր և պարբերություններ, որոնք պարունակում են անհրաժեշտ տեղեկատվություն:

Հաջորդիվ առանձնացված պարբերությունները անհրաժեշտ է ուշադիր ընթերցել: Այստեղ օգտակար է անել հետևյալ հարցադրումները.

1. Ի՞նչ տեղեկություն է անհրաժեշտ իմ հետազոտության համար:
2. Ի՞նչ փաստերի վրա է հեղինակը հիմնվում՝ իր վարկածը հիմնավորելու համար:

Գրանցել կարևոր հատվածները

Ընթերցանության ժամանակ խորհուրդ է տրվում գրի առնել նյութում հանդիպող հիմնական կետերը, ինչն օգնում է հեշտությամբ ըմբռնել իմաստն ու հնարավորություն է տալիս հետագայում ձեր իսկ բառերով վերարտադրել կարդացածը:



Այսպես կոչված «քաղվածքում» կարելի է նշել հեղինակին, աշխատության վերնագիրը, հրատարակության վայրն ու ամսաթիվը: Կարևոր է յուրաքանչյուր գրառումը նշել իր համապատասխան էջի համարով, որպեսզի կարողանաք հղում անել աղբյուրին, եթե որոշեք մեջբերել հեղինակի մտքերը ձեր աշխատությունում: Կարևոր տերմինները, նախադասությունների հատվածները, նախադասությունները և պարբերությունները պետք է ամբողջությամբ գրվեն: Մեկնաբանությունը և ձեր սեփական մտքերն առանձին հատվածների վերաբերյալ նույնպես պետք է ներառվեն քաղվածքում, բայց արդեն որպես ձեր սեփական նշումներ:

Հարցականի տակ դնել գրականությունը

Ինչպես ցանկացած ուրիշ գրավոր աղբյուրի դեպքում, գիտական շարադրանքի հետ աշխատելիս կարևոր է քննադատական հարցեր տալը.

- Արդյո՞ք հեղինակի բարձրացրած հարցերի պատասխանները տրված են: Արդյո՞ք համոզիչ է հեղինակի՝ պատասխաններին հանգելու ձևը:
- Կարո՞ղ է հեղինակը ապացուցել իր պնդումների ճշմարտացիությունը՝ հենվելով առաջնային աղբյուրների վրա, թե՞ նա խոսում է ենթադրություններով:
- Շարադրանքը թույլ տալի՞ս է հետևել հեղինակի փաստարկների հաջորդականությանը: Այն համոզի՞չ է:
- Հեղինակին հաջողվե՞լ է անդրադառնալ նյութի առանցքային կետերին: Նա կարողացե՞լ է կարևոր հարցեր բարձրացնել և պատասխանել հակափաստարկներին:
- Արդյո՞ք հեղինակի ընտրած տեսակետը անհիմն սահմանափակում է թեմայի քննարկումը:



«Կարդալ» վիճակագրությունը

Վիճակագրությունը կանոնավոր կերպով հավաքագրված տեղեկատվությունն է՝ արտահայտված թվերի միջոցով: Թվերը ցուցադրվում են աղյուսակների կամ գրաֆիկների միջոցով, ինչպիսիք են դիագրամները կամ գծապատկերները:

Առաջին հայացքից թվում է, որ վիճակագրությունը առավելություններ ունի տեքստային աղբյուրների նկատմամբ. այն պարզ, համեմատելի ու նկարագրական է թվում և սահմանափակ տարածության մեջ մեծ ծավալի տեղեկատվություն է հաղորդում:

Բայց իրականությունը քիչ այլ է: Իրականում վիճակագրությունը միայն թվում է օբյեկտիվ: Ի վերջո, ինչպես ցանկացած այլ աղբյուր, վիճակագրությունը նույնպես ստեղծվում է որոշակի մտադրությամբ:

Դա նշանակում է, որ վիճակագրական տեղեկատվություն կազմող անձը տվյալների հավաքագրման ժամանակ ունի որոշակի շարժառիթներ և հետաքրքրություններ: Այդ իսկ պատճառով վիճակագրությունը պետք է մեկնաբանել ինչպես ցանկացած այլ աղբյուր: Հետևյալ հարցերը օգտակար կլինեն այս առումով:

- Ո՞վ է կազմել վիճակագրությունը: Աղբյուրը հղելիս նշեք դրա հեղինակին, աղբյուրի վերնագիրը և գտնվելու վայրը:
- Ո՞րն է վիճակագրության թեման:
- Ո՞րն է տվյալների աշխատագրությունն ու ժամանակաշրջանը:
- Ի՞նչ հարցերի պատասխան են տալիս վիճակագրական տվյալները:
- Որքանո՞վ են տվյալները վստահելի:
- Ի՞նչ տվյալներ են թաքնված հասկացությունների հետևում:
- Ի՞նչ տեղեկություն կարելի է քաղել:
- Հնարավո՞ր է արդյոք որոշել նմանությունները, փոփոխությունները, պայմանները, միտումները:
- Ի՞նչ հարցեր են մնացել բաց:
- Արդյո՞ք վիճակագրությունը փորձում է ինչ-որ բանում համոզել ընթերցողին:

Լուսանկարներ. իրականությունը քառակուսու մեջ

«Լուսանկարը ցույց է տալիս այն, ինչ կա» արտահայտությունը միայն մասամբ է համապատասխանում իրականությանը: Լուսանկարը, վստահաբար, կարող է ցույց տալ ինչ է եղել ֆոտոխցիկի առջև, երբ նկարողը սեղմել է կոճակը: Բայց ինչպե՞ս, ե՞րբ և ի՞նչ պայմաններում է դա տեղի ունեցել, ի՞նչ էր կատարվում կադրից դուրս և ինչու՞ է լուսանկարիչը ընտրել հենց տվյալ տեսարանը, հաճախ շատ դժվար է պարզել, քանի որ այդ հանգամանքների մասին տեղեկությունը ուղղակի առկա չէ պատկերում:

Ավելին՝ լուսանկարները հնարավոր է խմբագրել և դա արվում էր նույնիսկ մինչև թվային դարաշրջանի սկիզբը: Դիմանկարները հաճախ մշակվել են. քաղաքական գործիչների խմբակային լուսանկարները կեղծվել են, և անձինք, որոնք ինչ-ինչ պատճառներով շնորհագրվել են, հետագայում «անհետացել են կադրից»: Սակայն չնչին փոփոխությունները ավելի տարածված են, քան միտումնավոր կեղծումները. օրինակ՝ երբ լուսանկարը կտրում են այնպես, որ այն ներառի պատկերի միայն այն հատվածը, որը հետաքրքիր է խմբագրին:

Այսպիսով, պետք է մանրակրկիտ քննել պատկերը՝ նախքան այն որպես աղբյուր ձեր աշխատությունում ներառելը: Ահա մի քանի հարցեր, որոնք կարող են օգտակար լինել:

- Ե՞րբ և որտե՞ղ է արվել լուսանկարը: Հնարավո՞ր է պարզել ինչն է դրդել լուսանկարչին նկարել:
- Ո՞վ է արել լուսանկարը և ո՞ւմ պատվերով:
- Ի՞նչ կա պատկերում: Ի՞նչ տարրեր են տեսանելի: Ինչպե՞ս է կառուցված պատկերը (առարկա, ֆոն, տեսողական դաշտի կենտրոն, արդյո՞ք նկարը կտրված է):
- Պատկերը մշակվե՞լ է (ռետուշ, մոնտաժ, չափի փոփոխություն):
- Արդյո՞ք պատկերն ունի հիմնական մոտիվ կամ թեմա, համապատասխանում է իր ժամանակին: Գործ ունենք բեմադրվա՞ծ, թե՞ պատահական նկարված պատկերի հետ: Լուսանկարը սիրողական է, թե՞ պրոֆեսիոնալ:
- Ի՞նչ կարծիքի էք լուսանկարի վերնագրի և կցված տեղեկության վերաբերյալ: Արդյո՞ք դրանք արժեհամակարգային դատողություններ են պարունակում, միտված են դիտողի վրա ազդելուն կամ կեղծ տեղեկություն են պարունակում:
- Անցյալի մասին ի՞նչ տեղեկություններ կարելի է քաղել լուսանկարից և անցյալի մասին ի՞նչ մեկնաբանություն պետք է փոխանցել, ի՞նչպես: Ի՞նչ էք կարծում, որն է լուսանկարի ուղերձը:
- Կա՞ն արդյոք անպատասխան մնացած հարցեր:

Պաստառներ.

Նախատեսված են ազդեցություն գործելու համար

Ո՞րն է պաստառի նպատակը: Պաստառները պատահական չեն ստեղծվում, այլ պատրաստվում են շատ հատուկ նպատակով. դրանք կոչված են տեղեկացնելու և ազդելու հնարավորինս մեծ թվով մարդկանց վրա, տեղադրվում են հանրային վայրերում, փողոցներում և հրապարակներում, պատերին, կրպակների վրա, պատուհաններին և այլն: Պաստառները կա՛մ գովազդում են ինչ-որ բան, կա՛մ ինչ-որ բանի համար աջակիցներ գրավում, կա՛մ անում են հակառակը՝ փորձում են արձագանք առաջացնել ինչ-որ բանի դեմ: Պաստառները պետք է գրավեն անցորդների ուշադրությունը, ուստի պետք է լինեն գրավիչ և հեշտ ընկալելի. պետք է արագ տպավորություն գործեն: Ինչպե՞ս: Մեծ ձևաչափի և գույնի կամ գունազեղ ձևավորման, սցենարի և «ճկունության» միջոցով. այլ կերպ ասած՝ պարզեցված և, հետևաբար, գրավիչ ուղերձի շնորհիվ:

Դպրոցի պատմության գրքերում հավանաբար տեսել եք քաղաքական պաստառներ, այդ թվում՝ նախընտրական և քարոզչական պաստառներ: Այսօր պաստառները ավելի հաճախ օգտագործվում են հանրային վայրերում՝ ի թիվս այլոց, սպառողական ապրանքներ, մշակութային միջոցառումներ և ժամանց գովազդելու նպատակով: Դրանք հնարավորություն են տալիս պատկերացում կազմելու ժամանակակից մտեցումների, վարքագծերի, արժեքների, միտումների, գաղափարների և հայտնի մարդկանց մասին: Այդ իսկ պատճառով միջտ կարևոր է ուշադիր և քննադատաբար դիտարկել պաստառները՝ անդրադառնալով հետևյալ հարցերին :

- Առաջին տպավորություն. ի՞նչն է անմիջապես գրավում ձեր ուշադրությունը, և ի՞նչն էք համարում «գրավիչ»:
- Որևէ ուշագրավ բան նկատվո՞ւմ է, օրինակ՝ չափը, գունային կազմը, տարրերի դասավորությունը, առարկաները, խորհրդանիշները:
- Գործ ունե՞ք իրատեսական, «բնական» պատկերի, թե՞ ոճավորված պատկերի կամ ծաղրանկարի հետ:
- Ի՞նչ կապ կա պատկերի և տեքստի միջև (տեքստի և ուղերձի ծավալը, օգտագործված տառաչափն ու տառատեսակը):
- Ե՞րբ և որտե՞ղ է տպագրվել պաստառը: Արդյո՞ք պատվիրատուի և «հեղինակի» անունները նշված են:

Նկարագրություն

- Ի՞նչ ազդեցություն պետք է ունենար պաստառը, երբ ստեղծվում էր և հանրայնացվում (օրինակ՝ տեղեկացնել կոնկրետ փաստերի մասին, մարտահրավեր նետել, ինչ-որ բան բացատրել, դիրքորոշում քննադատել):
- Ի՞նչ տպավորություն է թողնում պաստառը ձեր վրա: Ինչպե՞ս կարող էք բացատրել դրա ազդեցությունը:

Հուշակոթող

Հուշակոթողը կարող է լինել շինություն, հուշատախտակ, բազմաբնակարան շենք, գործարան, այգի, փողոցի կամ շենքի անվանում: Հուշակոթողը կոչված է լինել հիշեցում մարդկանց կամ պատմական իրադարձությունների մասին:

Հուշարձանը հետազոտելիս պետք է հաշվի առնել, որ հուշարձանի «բովանդակությունը» վերաբերում է անցյալին: Դրա առաքելությունը կապված էր այն մարդկանց հետ, ովքեր ողջ էին հուշարձանի կանգնեցման պահին: Քաղաքական պայմանների փոփոխության դեպքում հուշարձանի դերը նույնպես կարող է կտրուկ փոխվել: Օրինակ՝ բազմաթիվ ցարական հուշակոթողներ ոչնչացվեցին 1917 թ. Ռուսական հեղափոխության ժամանակ, նույնը տեղի ունեցավ Լենինի և սովետական այլ առաջնորդների արձանների հետ 1990-ականների սկզբին՝ Խորհրդային Միության փլուզումից հետո:

Ահա թե ինչ է պետք հաշվի առնել, երբ գիտական հետազոտության շրջանակներում աշխատում եք հուշարձանների հետ:

- Որտե՞ղ է այն կանգնեցված (քաղաքի կենտրոնում, հրապարակում, հանրային այգում կամ միգուցե գերեզմանատանը): Ի՞նչ նյութից է այն պատրաստվել:
- Ի՞նչ է այն պատկերում (անձ, այուն, պատ, շենք): Ե՞րբ, որտե՞ղ և ի՞նչ նպատակով է կառուցվել հուշակոթողը: Ո՞վ է պատվիրատուն, ո՞վ է հեղինակը:
- Կիրառվե՞լ են խորհրդանիշեր կամ այլաբանական կերպարներ (օրինակ՝ խաչ, սաղավարտ, արծիվ, հրեշտակ):
- Առկա լինելու դեպքում, ինչպե՞ս են պատկերները կազմակերպված և պատկերված. ի՞նչ դիրքում են, ի՞նչ են կրում և այլն:
- Կա՞ն արդյոք գրություններ (օրինակ՝ տեքստեր, անուններ):
- Կա՞ն արդյոք փոփոխությունների հետքեր (քայքայում, վանդալիզմ, վերականգնում, լրացումներ):
- Ի՞նչ ազդեցություն է թողնում հուշահամալիրը ձեզ վրա:

- Ինչպե՞ս են ժամանակակիցները արձագանքել հուշարձանի կանգնեցմանը: Պահպանվե՞լ են արդյոք փաստաթղթեր դրա բացման, «պատմության», դրա շուրջ հետագա զարգացումների մասին:
- Ինչպե՞ս են այսօր ընկալում և արժևորում հուշարձանը այցելուները, իշխանությունները:
- Ի՞նչ միջոցառումներ են անհրաժեշտ հուշահամալիրի պահպանման համար և այդ միջոցառումներից որո՞նք են ձեռնարկվել:

4. ՆԵՐԿԱՅԱՑՈՒՄ

Վերջնական տեսք.

հետազոտական աշխատանքի ներկայացում

Հետազոտական ծրագրի պլանավորումից, նյութը հավաքագրելուց, վերլուծելուց և գնահատելուց հետո սկսվում է աշխատանքի վերջին փուլը՝ նախագծի ներկայացումը: Վերջում անհրաժեշտ է պատշաճ ձևով ի մի բերել հետազոտության արդյունքները:

Նախապատրաստվելու ընթացքում պետք է պատասխանել հետևյալ հարցերին.

- Ի՞նչ էք ցանկանում հասնել այս ներկայացմամբ: Ի՞նչ էք ցանկանում հասցնել ընթերցողին /դիտողին /լսարանին:
- Ու՞մ համար է նախատեսված ներկայացումը:
- Ինչպիսի՞ն է ձեր նյութը, և ի՞նչ տեսակի ներկայացում է լավագույնս համապատասխանում տվյալ նյութին:
- Ի՞նչ հասանելի միջոցներ կան (ժամանակ, տարածք, տեխնիկա, ֆինանսներ):
- Ինչպիսի՞ հատուկ կարողություններ ունեն խմբի անդամները, որոնք կարող են ազդել նախընտրելի ձևով ներկայացման վրա:

Նախնական
հարցեր

Այս հարցերին պատասխանելուց հետո կարող եք դիտարկել այն բազմաթիվ ձևաչափերը, որոնց միջոցով հնարավոր է ներկայացնել հետազոտական նախագիծը.

- գրքույկ, գիրք կամ հոդված (վերջինս ամենատարածված ձևն է)
- շարադրություն/էսսե
- կոլաժ
- ցուցահանդես
- թատերական ներկայացում
- մամուլի ասուլիս
- սահիկահանդես կամ լուսանկարչական ցուցահանդես
- պատմական զբոսանք-էքսկուրսիա
- դասախոսություն
- պաստառ
- վիդեո / ֆոտո պատմություն
- փողբապ
- այլ

Նախագծի
ներկայաց-
ման ձևեր

Եղե՛ք ստեղծագործ: Հնարավոր է մեկտեղել ներկայացման մի քանի ձևեր:

Շարադրություն, Հասե. կառուցվածք

Պատմության հետազոտական նախագծի արդյունքները հիմնականում ընդունված է ներկայացնել գրավոր կերպով: Բազմաթիվ նյութերը կանոնավոր շարադրանքի վերածելու համար նախնառաջ անհրաժեշտ է ստեղծել թեմայի կառուցվածքային պլանը:

Իհարկե, նախնական պլանը ստեղծվում է հետազոտական նախագծի ժամանակ, երբ հստակեցվում են թեմայի առանցքային խնդիրները: Շարադրության կառուցվածքը, իր հերթին, ներառում է **ներածություն, հիմնական մաս, եզրակացություն և հավելված**:

1. Ներածություն

Ներածության միջոցով ընթերցողը ծանոթանում է աշխատանքի ընդհանուր գաղափարին: Այստեղ նշվում են թեման, հիմնական խնդիրները, նպատակներն ու առանցքային միտքը: Ներկայացվում են աղբյուրները և հետազոտության մեթոդները, բացատրվում է աշխատանքի կառուցվածքը և հետազոտության ընթացքում առաջացած խնդիրները: Ներածությունները առավել արդյունավետ են, եթե ընթերցողի մեջ հետաքրքրություն են առաջացնում աշխատանքի նկատմամբ, օրինակ, եթե տեքստը սկսվում է մի մեջբերումով, որն իր մեջ խտացնում է թեման:

Ներածություն

2. Հիմնական հատված

Հիմնական հատվածը թեմայի բովանդակային մասն է, որը հիմնված է հետազոտական փուլի նախնական պլանի վրա: Այս փուլում պլանը նորից կարող է փոփոխվել: Տարբերակվում են ժամանակագրական և թեմատիկ (համակարգային) պլանները: Ժամանակագրական կառուցվածքի դեպքում բավարար չէ միայն նշել տարեթվերը որպես ենթավերնագրեր (Իմ դպրոցը 1953թ., 1954թ., 1955թ., 1956թ.): Պետք է շեշտել իրադարձությունները: Թեմատիկ կառուցվածքի դեպքում առաջնային է բովանդակային կողմը, որը կարող է ներառել ժամանակագրություն: Ժամանակագրական ուրվագիծը շեշտում է ժամանակի ընթացքում եղած զարգացումները, մինչդեռ թեմատիկ կառուցվածքը ընդգծում է որոշակի թեմատիկ կետեր, որոնց ժամանակագրությունը կարող է երկրորդական լինել:

Հիմնական
հատված

3. Եզրակացություն

Եզրակացությունը ամփոփում է ամենից կարևոր արդյունքները և շեշտում առանձնահատուկ փորձառությունները: Այստեղ տեղին է պատասխանել ներածության մեջ բարձրացված հարցերին: Եզրակացության մեջ կարելի է անդրադառնալ դեռևս չուսումնասիրված խնդիրներին և ինչ հետագա հետազոտություններ կարող են արվել այդ բացերը լրացնելու համար: Ի վերջո, եզրակացությունը կարող է ներկայացնել, թե ինչպես կարող է այս տեղային օրինակը լույս սփռել ավելի լայն, տարածաշրջանային կոնտեքստի վրա, թե ինչ կարևորություն ունի այս պատմական օրինակը ներկա իրավիճակի վրա, և, վերջապես, ինչն էր հատկապես զարմանալի հետազոտական նախագծի բովանդակության մեջ:

Եզրակացություն

4. Հավելված

Հավելվածում կարող են նշվել աշխատության մեջ օգտագործված նյութերի աղբյուրները: Հետևյալ բաժինները պետք է ներառվեն հավելվածում.

- օգտագործված գրականության և բոլոր գրքերի ամբողջական ցուցակը,
- բոլոր հարցազրույցների ցանկը,
- օգտագործված ինտերնետային կայքերի ցանկը:

Եթե հիմնական տեքստային հատվածում որոշ կարևոր տեղեկություններ չեն տեղավորվել, ապա դրանք նույնպես կարելի է ներառել հավելվածում. աղյուսակներ, դիագրամներ, նկարներ, հարցազրույցների տրանսկրիպտներ, հույժ կարևոր փաստաթղթերի պատճեններ: Վերջիններս հավելվածում ներառելու դեպքում պետք է հիմնական տեքստի մեջ անպայման հղում տալ յուրաքանչյուր փաստաթղթին:

Հավելված

Շարադրություն / Էսսե. մեջբերումներ

Գրավոր աշխատությունը (շարադրություն / էսսե) ավելին է, քան նյութը վերցնելն ու նույնությամբ փոխադրելը (կամ համացանցից կրկնօրինակելն ու օգտագործելը սեփական տեքստի մեջ): Անհրաժեշտ է բովանդակությունը շարադրել սեփական բառերով, իսկ մեջբերել միայն առավելապես կարևոր հատվածները, որպեսզի հնարավոր լինի դրանք մեկնաբանել, կամ համատեղել ձեր փաստարկների հետ:

Ինչու՞ են մեջբերումները կարևոր

Գրավոր խոսքերը, ինչպես նաև արվեստի ստեղծագործությունները համարվում են «մտավոր սեփականություն», որի դեպքում տվյալ գաղափարների, աշխատությունների կամ գիտական հայտնագործությունների ստեղծողները պետք է նշվեն: Հակառակ դեպքում, դա համարվում է գրագողություն, այսինքն՝ մտավոր սեփականության զոհություն:

Ինչու՞ անել մեջբերումներ

Մեջբերումներ անելու կանոններ

Մեջբերումներ
անելու
կանոններ

- Մեջբերումը արվում է չակերտներում:
- Հղում անելու դեպքում պետք է օգտագործել հեղինակի ճշգրիտ բառերը (գրավոր կամ բանավոր):
- Կրճատումները պետք է նշվեն փակագծերով և բազմակետերով (...):
- Միշտ պետք է նշվի մեջբերման աղբյուրը: Մեջբերման աղբյուրը նշվում է նաև այն դեպքում, երբ գրում եք պարբերությունները, որոնք շատ նման են կամ ամփոփում են մեկ այլ տեքստ:
- Պետք է նշվի նաև օգտագործվող լուսանկարների աղբյուրը. օրինակ գիրքը կամ արխիվը, որտեղ գտնվում է տվյալ լուսանկարը:
- Զրույցի դեպքում պետք է նշվեն հարցազրուցավարի ու զրուցակցի անունները և հարցազրույցի ամսաթիվը: Հարցազրույցի կամ դրա ամենակարևոր հատվածների սղագրությունները պետք է ներառվեն հավելվածի մեջ:
- Ինտերնետային կայքերի դեպքում պետք է նշվեն վեբ հասցեները: Նշված կայքերը պետք է նաև ներառվեն հավելվածի մեջ:
- Բոլոր հղումները /աղբյուրների նշումները պետք է լինեն ծանոթագրության տեսքով՝ մեջբերման նույն էջին: Ծանոթագրությունները լինում են թվային հերթականությամբ: Գրականության ցանկում պետք է ներառել հեղինակի անունը, տեքստի վերնագիրը, նաև ենթավերնագիրը (առկայության դեպքում), հրատարակությունը, տպագրության տեղն ու տարեթիվը, և մեջբերման համապատասխան էջը կամ էջերը: